

明史彙

列傳第四十八

光祿大夫 經筵講官明史總裁戶部尚書加七級臣王鴻緒奉

敕編撰

陳循

蕭鑑

王文

江淵

徐有貞

許彬陳汝言

陳文

萬安彭華

劉珏

劉吉

尹直

陳循字德遵泰和人永樂十三年進士第一授翰林修撰習

朝廷典故帝幸北京命取祕閣書詣行在遂留侍焉三殿災

陳數事皆嘉納洪熙元年進侍講宣德初與楊溥同受命直

南宮日承顧問賜第玉河橋西凡巡幸未嘗不從進侍講學

士帝以文翰自喜御史張楷獻詩欲罪之循曰彼亦忠愛故

也遂解御史陳祚觸帝怒循爲婉解因事進言頗有足采者
正統元年兼經筵官久之進翰林院學士九年入文淵閣典
機務初廷議時政三楊主之至是士奇榮已卒循及曹鼐馬
愉皆得預議明年進戶部右侍郎兼學士土木之變人情洶
洶循居中所言多采納進戶部尚書兼職如故也先犯京師
請敕各邊精騎入衛馳檄回番以疑敵帝皆從其計景泰二
年以葬妻與鄉人爭墓地爲前後巡按御史所不直循輒訐
奏給事中林聰等極論循罪帝置不問循本以才望顯及是
素譽墮焉尋進少保兼文淵閣大學士帝欲易太子內畏諸
閣臣先期賜循及高穀江淵王一寧蕭鎡金比下詔議循等
遂不敢諍加太子太傅復賜黃金五十兩循嘗集古帝王行

事各勤政要典上之河南江北久雪麥苗皆死請發帑金市麥種給貧民帝嘉納進華蓋殿大學士兼文淵閣如故循子英及王文子倫應順天鄉試被黜相與構考官劉儼黃諫爲給事中張寧等所劾帝亦終不罪英宗復位于謙王文死杖循百戍鐵嶺衛循久居政地刻躁爲士論所薄其嚴譴非帝意也石亨等敗循自貶所上書自訟言天位陛下所固有當天與人歸之時羣臣備法駕設大樂恭詣南內奉請臨朝非特官禁不驚抑亦可示天下萬世而亨等僥倖一時計不出此卒皆自取禍敗臣服事累葉曾著微勞實爲所擠惟陛下隣察詔釋爲民一年卒成化中于謙事雪循子引例請卹乃復官賜祭同邑蕭鑑字孟勤宣德二年進士需次於家八年

帝命楊溥合選三科士拔二十八人爲庶吉士鉉爲首授編修正統三年進侍讀久之代李時勉爲國子監祭酒景泰初以老疾辭監丞鮑相率監生三千人叩闕請留帝可其奏明年以本官兼翰林學士入直文淵閣進戶部右侍郎兼官如故易儲議起鉉曰無易樹子霸者所禁矧天朝乎不聽加太子少師竇宇通志成進戶部尚書帝不豫諸臣議復憲宗東宮李賢私問鉉鉉曰旣退不可再也英宗復位遂削籍天順八年卒成化中復官賜祭鉉學問該博文章爾雅然性猜忌遇事多退避云

王文字千之初名強東鹿人永樂十九年進士授監察御史宣德末奉命治彰德妖賊張普祥獄還奏稱旨賜今名遷陝

西按察使遭父憂命奔喪起視事正統三年以薦擢右副都御史巡撫寧夏入爲大理卿遷右都御史九年出視延綏寧夏邊務劾治失律將校都督黃真以下二十人罪邊徼爲肅明年代陳鑑鎮守陝西平涼臨洮鞏昌饑奏免其租尋進左都御史在陝五年鎮靜不擾景泰改元召掌院事文爲人深刻有城府面目嚴冷與陳鑑同官一揖外未嘗接談諸御史畏之若神廷臣無敢干以私者然中實柔媚初按大理少卿薛瑄獄希王振指欲坐瑄死至是中官金英縱奴犯法下都察院治文鑑等但抵奴罪爲給事中林聰等所劾下詔獄二人具伏乃宥之內閣江淵嘗言法司斷獄多枉有詔辨理文及刑部尚書俞士悅求罷且言淵嘗私以事不聽故見誣帝

兩置之三年春加太子太保南京地震江淮北大水命巡視
偕南九卿議上軍民便宜九事又言徐淮間饑甚而南京儲
蓄有餘請盡發徐淮倉粟賑貸以應輸南京者轉輸徐淮補
其缺皆報可是時陳循最任好剛自用高穀與循不相能以
文彊悍思引與共政以敵之乃疏請增閣員循舉其鄉人蕭
維禎穀遂舉文而文得中官王誠助於是詔用文明年自江
淮還朝改吏部尚書兼翰林院學士直文淵閣二品大臣入
閣自文始尋遭母喪奪哀如前文雖爲穀所引而穀遲重循
性明決文反與循合而不附穀其後以子倫故欲傾考官又
用穀言而罷由是兩人卒不相得江淮大水復命巡視蘇松
常鎮四府糧每四石折白銀一兩民便之後戶部仍徵米輸

條淮凡一百十餘萬石率三石而致一石有破家者文用便
宜停之又發廩賑飢民三百六十餘萬時年飢多盜文捕長
洲盜許道師等二百人欲張大其功坐以謀逆大理卿薛瑄
辨其誣給事中王鍾乞會廷臣勘實止誅十六人還進少保
兼東閣大學士再進謹身殿大學士仍兼東閣初英宗之還
也廷臣議奉迎禮文時爲都御史厲聲曰公等謂上皇果還
也先不索土地金帛而遽送駕來邪衆素畏文皆愕竟不決
而罷及易儲議起文率先承命景帝不豫羣臣欲乞還沂王
東宮文曰安知上意誰屬乃疏請早選元良疏甫上而英宗
復位石亨等嗾言官劾文與于謙等謀立襄世子命鞠於廷
文力辯曰召親王須用金牌信符遣人必有馬牌內府兵部

可驗也辭氣激壯廷臣知其誣無敢爲言者遂與謙同斬於市諸子悉戍邊成化初赦還尋復官賜祭弘治中贈太保諡毅愍倫改名宗彝中成化二年進士歷戶部郎中出理遼東餉中官汪直東征言宗彝督餉有勞擢太僕少卿弘治中累官南京禮部尚書卒諡安簡

江淵字世用江津人宣德五年進士改庶吉士授編修正統十二年以侍講與杜寧等十人同入文淵閣肄業郕王監國孫有貞倡議南遷太監金英叱出之踉蹌過左掖門淵適入迎問之有貞曰以吾議南遷不合也於是淵入極陳固守之策遂見知於王超擢刑部右侍郎也先薄京師命淵參都督孫鏜軍事景泰元年出視紫荆倒馬白羊諸關隘督修鴈門

關其秋遂以本官兼翰林學士入閣預機務明年上言今春
土星入垣近太白晝見日食朔旦皆紀綱不振法度縱弛所
致臣乞先黜罷則如臣冒濫者亦必自退帝優詔慰留又明
年京師久雪淵上言漢劉向曰凡雨陰也雪又雨之陰也仲
春少陽用事而寒氣脅之占法謂人君刑法暴濫之象陛下
恩威溥洽未嘗不赦過宥罪竊恐有司奉行無狀冤抑或有
未伸且向者下明詔免景泰二年田租之三今復移檄追徵
則是朝廷自失大信於民怨氣鬱結良由此也帝乃令法司
申冤濫詰戶部違詔下尚書金濂於獄卒免稅如詔東宮既
易加太子少師四川巡撫李因不職以淵言罷之母憂起復
初侍講學士倪謙遭喪淵薦謙爲講官謙遂奪哀至是御史

周文言淵引謙正自爲今日地既不盡孝安望盡忠帝以事
旣處分不問命自今羣臣遭喪無濫保山東河南江北飢命
同平江侯陳豫往撫淵請築淮安月城以護常盈倉廣徐州
東城以護廣運倉并上軍民便宜數事悉議行時江北海飢
淮安糧運在塗者淵悉追還備賑漕卒乘機侵耗事聞遣御
史按實淵被劾當削籍廷臣以淵守便宜不當罪帝宥之閣
臣旣不相協而陳循王文尤刻私淵好議論每爲同官所抑
意忽忽不樂會于謙以病在告詔推一人協理部事淵心欲
得之循等佯推淵而密令商輅草奏示以石兵江工四字淵
在旁不知也比詔下調工部尚書石璞於兵部而以淵代璞
淵大失望英宗復位與陳循等俱謫戍遼東未幾卒初黃珌

之奏易儲也或疑淵主之丘濬曰此易辨也廣西紙與京師紙異索奏視之果廣西紙其誣乃白成化初復官

徐有貞字元玉初名瑄吳人宣德八年進士選庶吉士授編修爲人短小精悍多智數喜功名凡天官地理兵法水利陰陽方術之書無不諳究時承平旣久邊備媮惰而西南用兵不息瑄以爲憂正統七年疏陳兵政五事帝善之而不能用尋進侍講十四年秋熒惑入南斗瑄私語友人劉溥曰禍不遠矣亟命妻子南還及土木難作郕王召廷臣問計瑄大言曰驗之星象稽之歷數天命已去惟南遷可以紓難太監金英叱之胡濙陳循咸執不可兵部侍郎于謙曰言南遷者可斬也瑄大沮不敢復言景帝卽位遣科道官十五人募兵於

外理行監察御史事往彰德寇退召還仍故官理急於進取
自勑南遷議爲內廷訕笑久不得遷因遺陳循玉帶且用星
術言公帶將玉矣無何循果加少保大喜因屢薦之而是時
用人多決於少保謙理屬謙門下士遊說求國子祭酒謙爲
言於帝帝曰此議南遷徐理邪爲人傾危將壞諸生心術理
不知謙之薦之也以爲沮已深怨謙循勸理改名因名有貞
景泰三年遷右諭德河決沙灣七載前後治者皆無功廷臣
共舉有貞乃擢左僉都御史治之至張秋相度水勢條上三
策一置水門一開支河一濬運河議既定督漕都御史王竑
以漕渠淤淺滯運艘請急塞決口帝敕有貞如竑議有貞守
便宜言臨清河淺舊矣非因決口未塞也漕臣但知塞決口

爲急不知秋冬雖塞來春必復決徒勞無益臣不敢邀近功
詔從其言有貞於是大集民夫躬親督率閱五百五十日而
工成方工之未成也帝以轉漕爲急命廷臣議方略工部尚
書江淵等請遣中官偕文武大臣督京軍五萬人往助役期
三月畢工有貞言京軍一出日費不貲遇漲則束手坐視無
所施力今泄口已合決隄已堅但用沿河民夫自足集事廷
議遂寢事竣召還佐院事帝厚勞之復出巡視漕河濟寧十
三州縣河夫多負官馬及他襍辦所司趣之亟有貞爲言免
之七年秋山東大水河隄多壞惟有貞所築如故有貞乃修
舊隄決口自臨清抵濟寧各置減水閘水患悉平還朝帝召
見獎勞有加進左副都御史八年正月景帝不豫石亨張軌

等謀迎復上皇告太常卿許彬彬曰此不世功也彬老矣無能爲徐元玉善奇策盡與圖之亨卽夜至有貞家有貞大喜曰須令南城知此意軌曰陰達之矣令太監曹吉祥入白太后辛巳夜諸人復會有貞所有貞升屋覽乾象亟下曰時至矣勿失時方有邊警有貞令軌詭言備非常勒兵入大內亨擊門鎗夜四鼓開長安門納之旣入復閉以遏外兵天色晦冥亨軌皆惶惑謂有貞曰事當濟否有貞大言必濟趨之行旣薄南城門鎗毀牆以入上皇燈下獨出問故有貞等俯伏請登位乃呼進舉兵士惶懼不能舉有貞率諸人助挽以行忽星月開朗上皇各問諸人姓名至東華門門者拒弗內上皇曰朕太上皇帝也遂反走乃升奉天門有貞等常服謁賀

呼萬歲景帝明當視朝羣臣咸待漏闕下忽聞殿中呼噪聲
方驚愕俄諸門畢啓有貞出號於衆曰太上皇帝復位矣趣
入賀卽日命有貞兼學士入內閣參預機務明日加兵部尚
書有貞謂亨曰願得冠側注從兄後亨爲言於帝封武功伯
兼華蓋殿大學士掌文淵閣事賜號奉天翊衛推誠宣力守
正文臣祿千一百石世錦衣指揮使給誥券有貞遂誣少保
謙大學士王文殺之內閣諸臣斥逐略盡素德陳循亦弗救
事權盡歸有貞中外咸側目而有貞愈益發舒進見無時帝
亦傾心委任有貞旣得志則思自異於曹石窺帝於二人不
能無厭色乃稍稍裁之且微言其貪橫狀帝亦爲之動御史
楊瑄奏劾亨吉祥侵占民田帝問有貞及李賢皆對如瑄奏

有詔獎瑄亨吉祥大怨恨日夜謀構有貞而帝眷日隆時屏人密語吉祥輒令小豎竊聽故洩之帝驚問曰安所受此語對曰有貞漏言某日語某事外間無弗聞帝自是疏有貞會御史張鵬等欲糾亨他罪未上而給事中王鉉泄之亨吉祥二人乃泣訴於帝謂內閣實主之遂下諸御史獄併逮繫有貞及李賢忽雷雹交作大風折木帝感悟重違亨意乃釋有貞出爲廣東參政亨等憾未已必欲殺之令人投匿名書指斥乘輿云有貞怨望使其客馬士權者爲之遂追執有貞於德州并士權下詔獄榜治無驗會承天門災肆赦亨吉祥慮有貞見釋言於帝曰有貞自撰武功伯劾辭云續禹成功又自擇封邑武功禹受禪爲帝武功者曹操始封也有貞志圖

非望帝出以示法司刑部侍郎劉廣衡等奏當棄市詔徙金齒爲民亨敗帝從容謂李賢王翽曰徐有貞何大罪爲石亨輩所陷耳其釋歸田里成化初復冠帶閒住有貞旣釋歸猶冀帝復召時時仰觀天象謂將星在吳益自負常以鐵鞭自隨數起舞及聞韓雍征兩廣有功乃擲鞭太息曰孺子亦應天象邪遂放浪山水間十餘年乃卒有貞初出獄時拊士權背曰子義士也他日一女相託金齒歸士權時往候之絕不及婚事士權辭去終身不言其事人以是薄有貞而重士權許彬字道中寧陽人永樂十三年進士改庶吉士授檢討正統末累遷太常少卿兼翰林待詔提督四夷館上皇將還遣彬至宣府奉迎上皇命書罪已詔及諭羣臣敕遣祭土木陣